



交黎勦平事畧卷之四

奏疏

欽差提督兩廣軍務兼理巡撫兵部右侍郎兼都察

院右副都御史臣歐陽

為走報地方緊急

黎情事據廣東都司軍政僉書署都指揮僉事

梁希孔呈稱奉委統兵防捕崖州黎賊嘉靖二

十七年九月十三日據東界緝事軍人楊小七

等報有止強石訟賊首那燕等構結凡陽千家

羅活抱牒德霞抱宥多澗落段否淺八十餘巢

黎賊約五千餘徒突至大小落基山屯聚來攻



山馬地附廓坊廂等情本職督同指揮趙廷舉
王維達官脫章張凱等各率軍兵打手及土舍
許承宣自帶家兵齊向交戰當陣斬死黎賊四
十餘名止斬得功級五顆餘賊拖死回山陣傷
達官張凱一名旗軍徐廷秀等三名總甲鍾漢
一名打手高朝等十名土舍許承宣家丁十餘
名幸得各處鄉村秋毫無動獲功人員并効勞
軍兵備行崖州犒賞陣傷官兵照例處恤外爲
照止強石訟等巢黎賊聚黨兇悍本職所部官
兵驅馳程途遠涉至彼多有水土不服又值地

方歲歉米穀騰貴疾病者多寡莫敵衆而濱海
之地實無堪調應援之兵若俟畫圖貼說請兵
大舉一時緩不及事况今秋末一州田地拋荒
穀粟顆粒無收人民惶怖早乞督發戍守狼兵
或打手一千名應援截捕再乞請調右江附近
州縣土官目兵六七千名委謀畧指揮二員部
領前來暫行勦一二村巢使其驚懼少得目
前之安等因到臣據此案查先據廣東按察司
帶官分巡海南道僉事陳崇慶呈前事內開據
海南衛督備僭昌崖三所地方指揮王維瓊州

府崖州巡捕吏目王徽并崖州守禦千戶所各
申呈稟稱本年四月初三日據被害軍民林成
余賢等各告稱止強村黎人越出地名頭道水
殺死五人及黎應乾妻又包圍羊林村劫去耕
牛五十二隻又攻懷山園殺死軍餘李一鵬等
三名軍人石堅妻盧氏民戴見壇同妻黃氏初
四日在南下路殺死林睿林二等父子四命并
殺死黎芳晃民壯存孟恩等出于高村路殺死
牧牛人余引孫劫去沙牛三隻又黎人一宗出
郎落村殺死軍人劉坤妻母二命初五日又在

小落基村前殺死民吳印及小女二命初六日
黎賊四百餘人突過高地大山馬地村燒毀民
鄭受哥等房屋殺死民王元清奪去牛三十一
隻已行州所掌印巡捕官起集軍兵截捕又據
崖州知州葉應時稟稱問革土舍黎芳晃潛帶
甲頭肆爲侵擾遂致黎人奔逸猖獗釀成大釁
具稟到道嚴行府衛州所并督備官督率軍兵
追捕如果黎芳晃侵擾起釁就便撫諭解散其
黨又據崖州守禦千戶所申備崖州董平鄉民
黎紹穆告稱嘉靖二十六年十二月初二日本

州判官差趙坤文將鹽土碗入止強村每家派
碗一箇取膳鷄一隻鹽一碗取芝蔴五升各黎
遵從初四日趙坤文同王細恩捉拏黎人那燕
綁縛圖賴先次盜伊馬鞭勒取牛三隻或銀三
兩賠還那燕不忿叫伊姪男那內那乃當時殺
死趙坤文王細恩那燕投入羅活崗各黎驚懼
逃散那燕遺禾穀半倉嘉靖二十七年三月內
本州差民壯符孟恩押黎芳冕前去收取各黎
不與前禾黎芳冕回至抱世路口被黎殺死同
家人黎懷義符允英黎進德等并軍民余賢等

數命及小旗王直走報四月初十日黎賊圍劫
新興村燒毀房屋傷死民陳世雄等備倭總旗
詹瓊帶軍救護與賊對敵當將詹瓊射死備申
到道查與指揮王維知州葉應時所稟及府衛
呈報事情大異參詳各官前後具稟申報雖云
不同但激變黎情根由皆有顯跡可據今該所
申報判官黃本靜奸貪科擾黎人致縱趙坤文
等乘機捉局勒取牛財激黎大變殺人劫村禍
及無辜情甚可惡但出該所一面之詞中必有
故且該所署印百戶王羽目擊地方重情相應

急報却乃遷延悞事應合叅究除行府衛選委
謀勇府佐指揮等官各一員督領軍兵親詣該
州嚴督督備指揮王維并州所掌印巡捕巡司
哨守等官兵及該管土舍村首人等多方追捕
前賊及查致激起釁根由并各賊出劫鄉村燒
毀房屋殺死人口擄去牛畜各若干如果黃本
靜激變就便撫諭解散仍將各犯問罪招詳等
因該前提督兩廣軍務兵部右侍郎兼左僉都
御史張 會批看得地方激變黎情事各有因
該州判官并差入黎人役嚴提追究失事人員

叅來提究餘依擬行及看得各黎激變之由實
因判官黃本靜貪贓壞法撫字失宜所致案行
廣東按察司一面備行該道速將各黎撫處以
散其黨毋貽患害一面行拏州判黃本靜審究
明實具招連人解審續據海南衛并瓊州府崖
州各申備被害生員軍民陳相黎勉仁等各告
被黎賊流劫殺人擄掠財畜燒毀房屋及判官
黃本靜牌差甲頭趙坤文科擾激變事情又該
都御史張 會批各黎為亂始於止強一村激
變之由自有所坐仰分巡海南道即便量抽帶

雷蕙二府軍兵民壯人等前去該地方兼同本處軍快黎兵人等責委能幹官管領相機撫剿仍將判官黃本靜并平日剝害黎村奸民一一拏送按察司究問毋致延緩及出告示撫諭各黎散回村崗安分住種保守身家并行委都指揮梁希孔帶領新會縣打手容岳等二百八十七名前去會同分巡該道卽於雷蕙二府衛量抽軍兵民壯及從宜起調本處附近府衛州縣所軍快黎兵鄉夫選委謀勇官管領兼同該州所掌印巡捕哨守等官將爲惡作亂黎村首從

賊徒查出從長計議相機勦撫以散其黨若賊勢重大必須大舉示就具由通呈以憑會處未報續該臣接管又據瓊州府申備崖州申本年五月初三日據保平村民潘仕坤等報稱止強等村黎賊一千餘徒攻燒房屋四百餘間燒死民蛋男婦蘇惡圭等數十餘命劫掠財畜本州巡捕官督率民壯鄉兵到護方退又據藤橋巡檢司申據臨川里永寧等鄉民陳受王廷應蔡芳等并生員王凌翰等各呈告稱四月十二等日黎賊攻打樂羅下水小龍樂盤等村燒毀房

屋殺人劫財備申到州又據崖州千戶所舍餘
胡俊告稱四月初六日路遇黎賊趕殺民王懷
母并不識名一人俊走入山育男蔡四亦被砍
死又據通州耆士民黎仕卿等呈稱本州極處
海邊嘉靖十八九年羅活抱宥等村黎賊作亂
蒙調官兵征勦及委叅將鎮守僅得六年稍安
近奉議革前官未幾止強石訟等村殘黎那燕
那乃那內等起謀集衆本年四月初三日截殺
里長黎芳冕突劫山馬地新興等村今東界黎
崗抱籠抱亂等村黎首符亞利符亞壁等亦皆

效尤肆出攻燒樂盤樂道等三十餘村殺人劫
財乞請急賜附近衛所素有謀畧勇將一員并
漢達官軍打手及儋州七坊瓊山縣沙灣黎兵
三四千名先來防護地方城池次調土狼官兵
數萬前來勦滅本州連年荒旱米價騰貴官兵
糧餉俱乞預行區處等情據此照得本州孤懸
絕島內抵黎嶺外接海面全憑山馬地新興保
平水南等村周護城池今前賊生計先攻各村
殺人擄財民蛋失所東界抱籠抱亂等村效尤
殺擄累行藤橋通遠三巡檢司截捕彼亦人少

地隔無以禦敵州所旗軍民壯鄉兵策應不敷
訪得黎人所憚動曰程叅將若得調委提兵而
來將不戰自服若有別委量於各衛選取素有
謀畧武將一員帶領軍兵數千及調七坊沙灣
黎兵速赴拯救然後動調大兵征勦等因又准
督備指揮王維手本據崖州守禦千戶所申據
本州所熟黎并軍民生員土舍男婦高那妹王
公煥黎紹穆等陸續呈告并准合水營領哨千
戶俞宗關及崖州牒備藤橋巡檢司申據民蕭
廷章黃秉仁林文清等呈告俱被東西止強抱

籠抱亂抱喉境教他勞他喇打來打鴈抱虫抱
角打日打蝦抱挑南柳羅葵南連公糠抱打假
等村黎賊那燕林亞煉等攻打山馬地新興北
廂三叉河落盤番墓白地鹽竈海邊淡水沙尾
高沙厥竹林典打等處鄉村殺死人命擄去男
女牛畜又據崖州北廂民婦容氏狀告四月初
三日黎賊殺死夫黎玉川及民人符一方狀告
四月十三日黎賊攻燒海簷田庄殺死佃民男
婦陳弘等六命擄去陳赤一女劫去耕牛三十
六隻燒毀禾穀又據第五都民鍾興狀告義父

先置落羅田堆積三年禾穀一萬五百秤在倉
本年四月二十日被止強等尙黎賊盡燒一空
殺傷民陳秩等三人禍因本州貪贓知州葉應
特判官黃本靜累差民壯賴以學雇民王仕廣
替當同黎兇哥承牌進小營黎村外科馬站并
雜項銀穀被黎賊殺死王仕廣又差趙坤文進
止強黎村外派麀皮蟾蠟等貨被賊殺死趙坤
文王細恩本州官吏瞞昧上司又差土舍黎紹
穆往村批封賊首那燕那現禾倉復差民壯苻
孟恩押黎芳昇帶同苻允英仍進止強村搬運

那燕等禾穀被黎忿怒激亂又兼異境吏白役
門子吳世隆周文佐李珠環方文訓孫德輝等
計取各黎砍納六房等項木料每條取銀四五
錢方纒註數以此激變黎賊等因各到府除將
判官黃本靜拏究另詳一面行州所豎立大旗
招安撫處及照西界地名止強石訟等村賊首
那燕等結搆東界地名抱籠等村賊首苻亞利
等乘機倡亂糾合千餘黨燒劫村塲殺人擄畜
情犯深重罪不容誅本府即會海南衛暫委指
揮周昇選撥軍一百一十名又添撥軍三百名

本府委照磨杜格率領民壯一百二十名協同
防守又添撥民壯三百八十名奏該衛旗軍通
共九百一十名委官督率前去該州防禦相機
處報及將萬州陵水感恩三州縣土舍王天啓
符廷瑞王世熙婁德偉王應琦管轄黎兵諭令
精選各防守本州縣賊路要衝以遏交通今又
報賊千餘約日出攻城廓鄉村合無一面先行
從權暫調儋州文昌定安瓊山澄邁臨高等州
縣七坊沙灣等崗土舍黎首符日昭劉邦政許
承宣王行可王道動王順寧王世偉王一正等

各官轄聽調黎兵共約五千名選集聽候及行
海南衛抽撥各所旗軍舍餘一千名委指揮一
員統領前去相機策應仍乞速募新會縣打手
五百名并推選謀勇叅將或都指揮一員統領
直趨崖州鎮壓邊境各黎若自悔過以求生路
聽撫歸巢如仍不畏即行勘結畫圖貼說善惡
村分就將黎兵與旗軍打手分布哨道委官統
領進勦止強石訟等崗挫其銳氣以息殘黨如
或怙終不悛另調兩廣漢達官軍數萬委官統
領征勦等因到臣又經會批統領官與打手已

有行矣其餘事情仰分巡道即日疾趨該地方
會同梁希孔相機審勢協畫施行申內事勢似
急無更徐徐可也速由詳報及該臣催行帶管
分巡海南道僉事陳崇慶都指揮梁希孔即將
雷廉二府衛軍兵民壯人等作速量抽統領不
分雨夜兼程馳往崖州會同起調本處附近府
衛州縣所各軍快土舍黎兵鄉夫人等選委謀
勇能幹官員各管領前到該地方兼同該州所
掌印巡捕哨守等官分布防禦振揚兵威相機
勦撫先將良善不與村分撫諭安定以絕其聲
將其省惡村分臨以必勦之威開以求生之路
從宜撫處務使

國法得伸地方寧靖如或賊勢重大稔惡不悛不聽
撫處據情論法應該大舉勦滅即將應分哨道
合用兵糧等項事宜逐一會議周詳計處停當
具由通呈以憑會處施行及督行瓊州府推官
藍渭前去崖州督率官軍兵壯土舍峒首黎兵
鄉夫人等分布守把相機設法勦撫續據都指
揮梁希孔呈請添兵緣由又行廣東布政司支

銀三百兩發仰新會縣添募打手三百名并撥
指揮馮良佐哨官軍三百八十一員名達官舍
十五員名行令本官部領前去崖州截遏又據
瓊州府申備崖州申據西廂保平里民黎世重
黃富等告稱五月初三日被止強村黎賊殺死
民李召端及燒殺男婦陳緇周暹等一百餘命
燒毀房屋四十餘間劫去牛隻財穀又據抱歲
巡檢司申備八所村民黎定亨告稱五月初四
日黎賊截伏砍死男黎應科屯割嶺脚水溝欄
路劫殺人牛初七日攻圍八所村本司帶同鄉

兵前去防捕各賊退訖又據巡緝民壯邢耀宗
報稱止強等村黎賊燒劫大蛋村時本州知州
葉應時督同巡捕吏目王徽并報督備指揮王
維守禦千戶王鳳鳴洪曉百戶王羽督率旗軍
民壯人等策應被賊殺死軍人蘇鐸鄉兵民蛋
奮勇射死二賊傷有三十餘徒身死各賊奪走
鄉兵黎道宗等射傷一賊生擒送州續據西廂
大蛋等村民蕭允賢等并生員黎孟芳各告稱
五月初三等日黎賊殺死收禾人林氏同男蕭
冬二及攻燒各村房屋殺死生員陳德全并民

蛋男婦黎日進等刦擄牛隻又據通遠巡檢司
申稱五月十一日鄉兵林彪報稱黎賊砍進羊
欄村本司督率弓兵鄉夫救護被賊射傷王本
菲等七名兵夫射死二十餘賊內獲一功解州
看得前賊日加肆出為害愈甚合候申請多調
各衛所漢達官軍并儋州七坊瓊山沙灣土舍
黎兵救護等因備申前來又經會批仰分巡海
南道作速查行毋坐誤事機致貽民患先今未
盡事宜聽權宜處分由報又據瓊州府申據崖
州申備生員蛋民麥亨李壽山潘必緒陳朝瓚

等各告稱五月初三日黎賊殺死民陳懋中廖
孟臣等燒毀房屋搶刦家資又據抱歲巡檢司
申備大蛋村民蘇鑑等告稱五月初九日前賊
包村燒屋殺死男婦蘇鷄畜等二十餘命藤橋
巡檢司申稱巡檢唐本連督率鄉兵楊洪等殺
得賊級二顆又據永寧鄉里老民人王廣祿林
文秀等告稱黎賊刦殺民黎汝實等保平大蛋
等村民麥會林萬壽等告稱五月初三等日黎
賊殺死民潘純林檀香李氏等擄去牛畜藤橋
巡檢司申稱巡檢唐本連督兵吳鶴等殺獲賊

級二顆解州又據民黎本溪告稱五月初三日
帶同家人前去收禾被賊殺死母蕭氏家人劉
朝哥等三命搶牛六隻抱歲巡檢司申備山脚
等村教官林迥霄村民蘇廷俊等告稱五月初
八等日黎賊攻村燒屋殺死黃那路妻射傷王
周定等擄去牛穀家資又據南廂民慕容端告
稱因賊猖獗欲赴軍門建言忽遇黎賊九百餘
徒攻村燒毀房屋五十餘間殺死陳氏射傷周
小義劫去牛三十餘隻慕容端走報指揮王維坐
視放軍散行不護容端與辯喝軍扛打容端劫

去盤纏銀一兩衣服破失又據東廂民周世冊
等并民壯邢耀宗告報五月十六日黎賊一千
餘徒攻燒山馬地村本州巡捕官督兵對敵殺
傷賊約五十餘徒身死賊黨奪退又傷打手胡
國茂并村民周世策等四人及船戶蔡胡仔報
稱州差臨川場吏吳德琳領銀回場買鹽候濟
軍兵被黎賊殺死吳德琳并搭船客人蔡克詹
等四命千多保平等村民黃萬全林廷祿黃一
龍等告稱止強否淺抱班等村黎賊約六百餘
徒劫村殺死男婦馬氏陳世英陳世榮蒲亞沒

鄭紳陳士等燒毀房屋擄去牛馬等情到府看
得前賊流劫毒害深可憫惻合無先行儆州調
取七坊黎兵符日昭兵七百名劉邦政兵三百
一十名差巡檢李瑞陰陽官黎君然部領前去
崖州協同見在官兵防守等因又該臣會批據
申黎賊肆劫已四十餘日軍門雖已督發官兵
計程遙遠未能即到勢也該府去崖州不遠賊
勢至此尚未見一官一卒赴彼策應府佐貳官
多在乃以一照磨塞責使之遷延道路畏縮觀
望及其事急徒欲借勢於峒黎然則

國家設置府衛官吏將何爲也又如二巡檢司尚能
督率鄉民敵退賊勢以崖州一千戶所曾不見
遣一官兵出護何村指揮王維及靦顏忍心打
搶告人是無法也仰分巡道通行查究應叅官
負叅呈定奪賊勢已熾該道即宜督率官兵促
梁希孔徑趨崖州協謀相機剿捕撫處如兵復
不足聽於附近府衛再行量調務期大張

國威安定地方毋或稽違乖誤重貽民患又據崖州
申稱黎賊流劫各村及本府行提判官黃本靜
雇船於六月初四日發送家眷詹氏男黃棊表

叔胡震家人黃添孫丫頭秋蓮并金銀首飾衣服下船被黎賊突來將詹氏等殺死擄去秋蓮并財物去訖等因又會批仰分巡海南道查行并據海南衛申准督備指揮王維關備崖州儒學生員潘鳳鳴告稱判官黃本靜差趙坤文黎芳冕科害激變黎人緣由又經會批據申反覆止以黃本靜激變為辭夫黃本靜激變之罪已經拏問矣該衛所官督備官世享爵祿當此有事並未聞其出一兵與賊一面以拯一村一民於危厄之中曾一巡檢司之不若然則

國家設置衛所世費爵祿以養寵此輩將何為也本即當拏問但事在緊急仰分巡該道姑將各官俸糧查自失事之日為始任支該州掌印巡捕官一體任俸俱令其戴罪殺賊候事寧之日備查始末功罪參呈施行續又據帶管分巡海南道僉事陳崇慶呈准都指揮梁希孔手本開稱本年八月十五日據東界緝事軍人韓小外等稟報止強石訟等處黎賊約二千餘徒包圍多澳村攻打未破本職當督漢達官軍打手前去奮勇對敵斬獲賊級一顆殺死賊人一十餘名

因賊多衆奪屍不能斬級致被箭傷打手四名
傷死戰馬一匹前賊奔遁回山兵少不能窮追
雖調七坊黎兵千名然與黎人同類犬羊相為
犄角只得留守城池不堪截遏伏乞添發戍守
狼兵或報効土兵打手一千名查委謀勇指揮
一員督領前來應援如若招安不悛合就畫圖
貼說將應分哨道合用兵糧會議另呈等因備
呈前來又委雷州衛指揮顧賢督領軍門聽調
新會陽山二縣打手并思恩府報效日兵共八
百餘名前去崖州聽梁希孔統領協勢防捕隨

據該道呈准都指揮梁希孔手本開稱崖州賊
勢頗重若候動調大兵撲剿難應目前之急只
得從權設計招撫近日東西二界脅從為惡抱
浩新村沙鍋南辨南夏抱雷洛豪小多拋黑泥
多港大多拋匿才景才草尾大案邁村抱打等
村黎首蘇那水蘇那昂符那立玉那貴等各來
投見本職開諭利害示以恩信各亦輸誠悔罪
備行該州措備魚鹽花紅牛酒犒賞各置紅旗
一面給與回村安住每十日一次來見以羈其
不與止強石訟聲援崖民亦漸回村居業惟出

強石訟千家否淺止肥抱谷羅活抱宥德霞抱
牒抱道抱萬等村雖經多方撫諭尚爾負固反
側難度為照前賊殺擄人財流毒鄉村罪惡貫
盈應該殄滅但事情重大非敢輕舉及查牙力
之亞等處應該立營把截保民耕種第今兵分
勢寡早乞催促指揮范德榮并前呈打手狼兵
前來鎮壓除將未出黎村加意撫處觀其向背
另議等因到臣又經會批據先呈已委指揮顧
賢督領打手狼兵八百餘名趨赴矣范德榮未
經征戰仰再查如果可用另呈督發去後今據

前因臣會同鎮守兩廣地方總兵官征蠻將軍
太保兼太子太保平江伯陳 議照廣東瓊州
府地方僻在一隅孤懸海外黎岐山崗盤據聯
絡而崖陵等州縣切近五指諸山尤為黎寇淵
藪自昔叛服無常嘉靖十七等年間大肆猖獗
至二十年該前提督兩廣軍務兵部左侍郎兼
右副都御史蔡 鎮守兩廣地方總兵官征蠻
將軍太子太保安遠侯柳 奏

請調兵征剿地方平寧迄今僅及七年而止強石
訟等村賊首那燕那內那乃等又復效尤倡亂

傳箭邀黨大肆流劫殺擄人畜焚毀室廬事雖
發於判官黃本靜一人縱下之所激而地方官
平素撫字之無方武備之不脩均有不得而辭
者臣等謹遵照欽奉

勅諭但遇賊寇生發即便相機可撫則撫可捕則捕
及便宜處置事理當行分巡該道將黃本靜拏
解按察司究問地方失事官員姑暫令住俸戴
罪捕賊給榜招安委都指揮梁希孔統領官兵
前去撫捕內抱浩新村沙鍋南辨南夏抱雷洛
豪小多拋黑泥多港大多拋匿才景才草尾大

案邁村抱打等村即已悔罪輸誠投身聽撫惟
止強石訟千家否淺止肥抱谷羅活抱宥德霞
抱道抱萬等村尚爾負固猖獗至於敢肆劫近
城廓村分拒敵官軍論法即當殄滅但釁端起
於一人一村今叛亂雖衆誠恐其中尚有心欲
投順而不能自達迫於脅持而不能自脫者除
臣等一面先行廣西左右兩江土官衙門整棚
土兵聽調一面備行廣東布政司會同都按二
司各掌印官將合用兵糧等項事宜計議及委
先經統領征剿原任分守雷廉高肇地方今被

効聽調左叅將武鸞統領官軍疾趨崖州會同
守巡官與都指揮梁希孔協謀相機撫散黨與
剿除渠兇若仍固負猖獗勢須大舉即將應剿
村分應分哨道應用兵糧等項事宜悉心計議
畫圖貼說會呈施行通候議處停當及事寧之
日備查有功失事人員另行

奏報外緣係走報地方緊急黎情事理爲此具本

題

知

嘉靖二十七年十一月二十九日

欽差提督兩廣軍務兼理巡撫兵部右侍郎兼都察
院右副都御史臣歐陽 爲懇乞大兵剿除

劇惡黎賊早救民命以全地方事據廣東布政
司呈准本司等衙門右布政使等官蔡雲程等
咨各准本司咨關抄奉 臣案驗據守巡海南兵
備僉事等官陳崇慶等呈前事依奉行在廣東
按察司整飭兵備無分巡海南道副使朱憲章
手本准原任叅將武鸞都司署都指揮僉事梁
希孔手本會同議照崖州止強石訟千家羅活
抱宥德霞等巢黎賊首那燕那捧那奪那恨那

貶那叫等本以梟獍會憑負嶮巖梗化始因
激變遂至滔天盜弄兵戈僭稱名號恃五指等
山以爲窟穴結感昌諸黎以爲聲援而那恨等
先幸漏網而偷生今逞兇強以梟衆構集感恩
縣古鎮州峩淺等巢賊首存門欽等大肆猖獗
攻圍縣治拒敵官軍已非一次虔劉人民何止
百千姦淫婦女擄掠牛畜燒毀房產搜檢財物
兇焰益張橫行無忌昌化縣巫峩落漫抱英大
官田抱板等村亦皆乘時響應隨從助惡劫財
殺人村落爲之丘墟道路因而阻塞軍民受禍

慘不勝言告愬紛紜呻吟滿耳罪惡旣已貫盈
神人之所共怒師出有名刑在不赦若不大加
誅討則一州二縣之民久失耕種饑餒流離地
將無民矣先該會議兩哨監統各分小哨諸路
並進示頗周詳但恐地方廣濶巢穴數多賊徒
強衆事體重大誠有如軍門明見所慮者職等
仰遵成筭會同計議再三審訪參酌停當相應
分爲三大哨一中大哨分五小哨由感恩以至
抱臘千家等處進一左大哨分六小哨由陵水
縣以至藤橋大茅田等處進一右大哨分五小

哨由昌化縣以至茅安陀蠻等處進此皆質諸
父老詢訪鄉導况職等親履其地目擊耳聞略
得真實伏望再賜裁奪早乞差官齎執

令旗令牌督調左右兩江土官目兵及漢達官軍
打千人等齊集分委官員監統尅期進剿緣照
先年用兵班師太早漏網數多兵退數年旋復
爲患爲今之計必須駐兵久困務使根株悉拔
噍類無遺以雪萬姓之冤用靖一方之難功收
萬全一勞永逸毋徒目前竣事之急致貽日後
擾攘之虞再照用兵地方界連一州三縣層峰

疊障山嶺聯絡林菁蒙密巢穴星散按圖方寸
之間地里遠近不一若軍兵數少則分布不敷
土兵虛數此其故事伏乞軍門量加添撥庶得
實用其先聽撫今爲惡村巢相應撲剿及先因
激變陽順陰助近聽撫村分暫給旗榜護守候
事有次第另議呈奪及把截地方冊內分別開
載明白合用軍餉糧米賞功銀兩銀牌花紅段
紗布疋號頭旗榜紙劄藥財犒勞牛酒魚鹽與
夫軍火器械硝磺等件及渡海艚船渡港船隻
浮橋箴筏等項請乞各行所司預爲買辦整理

解發收貯聽候應用庶免臨期缺誤其餘善後事宜候各哨進兵事有次第另行會議呈奪等因備將再議過應剿黎賊村巢首從名數進兵哨道圖冊開送到道查得各官審訪善惡鄉村應留應剿議分三大哨又於各哨量分小哨進止機宜合用漢達土官軍兵打千名數及軍中一應事宜各官依照歷年征進事規開款議報亦已曲盡與本道審訪府州縣等官事體相同又准都指揮梁希孔手本開稱嘉靖二十八年二月二十六日據緝事傳報止強石訛等巢元

惡那燕等已入允陽等山構集岐賊聚斂八千限三月初間要出與官兵戰鬪是以本職於彼練兵屯結裝束候其截捕又據馬嶺營哨守百戶陸中玉口報及感恩縣知縣項邦柱呈稟賊首符門欽等即日又要糾集各賊攻劫縣邑大南屯等處等情到道看得各賊日加兇熾近又敢各僭樹官名擅用旗鼓出入聲言構黨拒敵官兵攻屠州縣此實法所必誅罪在不赦者也唯應速戮以慰民望爲此今將送到圖冊開送前去煩爲查照會議施行備行到司該布政司

掌印右布政使蔡雲程會同按察司掌印按察使李遂都司掌印署都指揮僉事劉滋分守海南道右叅議方民悅巡視海道副使黃光昇帶管糧儲左叅政沈應龍議照前項叛黎憑恃險阻大肆猖獗崖民節被殘掠而村落為空感恩繼遭圍困而焚燒殆盡殺戮男婦慘不可言拒敵官軍罔無所忌群聚犬羊而遠邇望風響應包藏變詐而負固比昔益堅罪惡貫盈神人共憤

天討在所必加大征斯不容已合用調集漢達土官

軍兵多寡開報各崗村巢首從賊徒名數分別善惡鄉村布列進止哨道等項機宜已該兵備副使朱憲章叅將武鸞都指揮梁希孔親臨審覈俱亦詳悉但該道條議事件比照嘉靖二十年大征舊規間有未備職等亦經叅酌損益開立前件議擬明白合候呈詳允日備行各該衙門查照一一作速舉行務要先事整備毋致臨期缺乏應用監督統督紀功并管理糧賞文武官員與廣西土官目兵人等并聽軍門選委督調尅期前去用事其中尚有未盡情節職等難

以遙度並聽各官隨機濟變應呈請者徑自呈
請施行等因又據瓊州府崖州鄉官原任知縣
趙文獻余繼舉教官溫仁張繼芳黎仕華蕭成
張統林迥霄王有本監生楊仕輔趙邦教生員
黎士奇張源等連名呈爲緊急賊情懇乞大兵
征勦事切見止強一村倡禍諸黎怙亂已經一
年攻破村鄉殺擄人財不可勝數蒙軍門發下
榜文深懲激變之人開誠撫諭許其自新守巡
道奉行節次委官招安都指揮梁希孔原任叅
將武鸞先後繼至皆以撫安爲先諸黎却乃恃

強負悍桀鷲不聽示諭誓死必戰聲言奪城據
地愈肆猖獗竊照崖黎先年爲患不過十百爲
群一遇軍兵罔敢拒敵今則動以千萬直前抗
戰殺人如菅彼黎素無統紀今則各樹名號有
總兵叅將指揮千百戶等官名目坐轎乘馬張
傘執旗戰有紀律鋒莫敢犯又構感恩縣古鎮
州黎賊攻毀縣治幾陷崖以東至陵水以西至
昌化七百餘里之路阻絕不通各民離散田地
拋荒饑孳充塞僵尸道路慘不可言幸得分巡
朱副使新臨鎮壓但彼衆我寡未免相持且儋

萬等處黎酋素懷異志乘之而起三州十縣竟為所圖緣今各賊勇戰甚可寒心彼若乘勝長驅城廓盡為屠戮非急大舉不能掃除以救殘民非久屯駐不能殲滅以免後悔懇乞憐憫海隅蒼生早發大兵征剿仍設叅將府于其中開通道路立營要地殲其餘黨然後相宜設立官司屯所募民居耕以圖經久等因各到臣據此案查先為起報地方緊急黎情事節據廣東按察司帶管分巡海南道僉事陳崇慶并海南衛及瓊州府崖州各呈申稱崖州西界止強石訟

等村黎賊首那燕等作亂攻劫鄉村殺擄人財燒毀房屋及判官黃本靜差趙坤文等科擾激變緣由前來俱經陸續督調漢達官軍打手日兵人等行委廣東都司署都指揮僉事梁希孔原任叅將武鸞各統領前去崖州會同該道守巡官嚴督該府州縣衛所官兵相機設法剿撫并行按察司將判官黃本靜拏究及行分巡該道將該衛所官督備官該州掌印巡捕官各俸糧自失事之日為始任支俱令戴罪殺賊候事寧備查始末功罪叅呈施行及該臣會同鎮守

兩廣地方總兵官征蠻將軍太保兼太子太保
平江伯陳 具本題

知外續據守巡海南兵備僉事等官陳崇慶等會
呈據瓊州府崖州廩增附生員裴源澤王昂等
六十名連名呈稱本州外臨海濱群黎省險內
據種類繁盛恒爲民患其羅活德霞抱宥多澗
千家等村已於嘉靖二十年征剿幸獲平安而
遺孽猶存若止強石訟落段否淺長門多港抱
臘抱雷等八十餘村雖以招安於一時實則長
傲於今日數年以來苟且羈縻面從心叛土舍

甲頭里役之輩又多倚勢科剋彼方蓄怨乘機
不期稔惡趙坤文承差科擾當激殺死嘉靖二
十七年四月初三日又激殺黎芳冕等釀成大
禍卽肆猖獗黨合群黎攻燒附城民村新興中
間路北邊千陀保平番坊大蛋小蛋高山卽芒
打席及東西二界三亞抱旺等一百餘村殺死
本學廩膳生員陳德全孛生員陳相麥芬潘鳳
鳴父陳世雄麥本教潘純生員陳理男陳懋忠
潘竒會女及軍民詹瓊趙鐸等計千餘命擄掠
財畜燒毀房屋不可勝計揚言掃除鄉村決要

攻害城池鄧蒙上司榜文及差儋州七坊峒黎
招撫各黎執拗不服且云我殺人數多罪不可
免于今只殺到死為止決不服招你每若再進
未定是殺了等語幸蒙統兵截捕城池僅保無
虞但東至陵水西至感恩相距六百餘里猖獗
之勢不减於昔時耕牧之民不得以出入道路
沮塞田地拋荒米價騰貴餓莩在途民之流離
於他鄉者無旣積屍盈野哭聲震天殘黎害物
之慘殆萬倍於儋州之符南蛇矣切趙坤文黎
芳冕及判官黃本靜之妻孥家屬數口已殺疑

若彼之讐怨可復顧乃長惡不悛諸峒之相附
日堅乘風響應愈肆叛逆殺戮無忌動輒支解
月無寧日其蔑視

王法甚矣罪不容誅若不預為之所則積勢日深群
黨固結棟焚之及崖民無唯類矣軍士久戍錢
糧之費耗寧有紀極也呈乞轉達請調兩廣漢
達狼兵剋期大舉破其巢穴擒其渠魁滅其種
類將來之太平有日而未盡之殘喘可蘇等情
又據崖州軍民鄉老魯文忠陳嚴等八十名連
名呈同前因并據小山馬地村軍民吳遷李瑒

等各狀告有止強石訟等處黎岐構結感恩縣古鎮州等處黎賊約有五千餘衆將本村包圍攻打房屋盡行燒毀殺擄男婦陳其韜等一十餘命財畜一空并據感恩縣申准掌印知縣項邦柱關稱崖黎倡亂越過本境殺擄人牛緣本縣原無城池邑僻村孤民稀兵少雖設民壯三十五名亦無人民應當實難捍禦近據走報古鎮州我淺等村賊首符門欽等聲言要攻縣但今人民無倚俱各流離四散誠恐患生不測乞爲殄滅等因各職會同議照瓊州府崖州止強

石訟千家羅活抱宥德霞等一百餘巢賊首那燕那奪那叫那貶等倚山負固稱爲牛首將目據險爲惡有年今乃嘯聚構結感恩縣古鎮州我淺我乍等處賊首符門欽等肆意衝突流劫鄉村殺死人命千餘燒毀廬室殆盡迫近城廓掃蕩村場荼毒生靈劫擄牛羊禍已慘極人神共怒法在必誅伏乞動調兩廣漢達官軍土兵人等尅期撲剿殄滅根蔓等因連繳會議過應分哨道圖冊前來臣等又經會行廣東都布按三司各行掌印并該道守巡兵備海道管糧等

官及原任叅將武鸞都指揮梁希孔督同該府州縣掌印官將應剿黎賊村巢再行備細審訪分別應留應剿的確另畫圖本應分哨道合用官兵糧餉賞功銀兩軍器馬匹船隻等項俱一一做照歷年征進事規查議款列呈奪及行分巡海南道副使朱憲章親詣該州再加推誠布德給示責令相信人役齎領入峒加意撫諭使知軍門體恤示以好生不殺之仁但有原被逼脅隨從爲亂者許即散回照舊任種或與相信人役赴官投首與免本罪送回原住鄉村安插

復業趁時耕種本分營生依舊糧差已往之愆俱不追究其原爲首倡亂之人罪不可赦省諭自行擒送到官依律處治又據該道呈稱感恩縣古鎮州賊首符門欽等糾黨攻圍縣治崖感道路梗塞不通乞於軍門見在打手土兵挑擇精銳三千名達官三十員名銃手三十名瓜哇銃二十把并火藥硝黃等項及將指揮張麒哨官軍選委謀勇指揮二員能幹千百戶四員統押前來交與叅將武鸞部下責令於崖感適中處所如牙力營或九所屯地方立營遏截等因

又該臣等會行廣東都司督調廣州右衛指揮
劉一葵更替指揮張麒管領本哨官軍四百零
五員名并摘撥下班達官舍二十員名神電衛
瓜哇銃手十五名俱責委神電衛指揮黑孟陽
張重仁督押及行分巡嶺東道選撥長樂程卿
等縣打手九百零三名差官督押前去聽叅將
武鸞調遣防捕續准兵部咨為緊急重大黎情
早乞添兵應援事該巡按廣東監察御史黃
題前事本部看得前項黎賊敢恃兇逆倡亂一
方鄉落遭其荼毒官兵被其殺傷惡貫已盈罪

在不宥但其起亂之由實因判官黃本靜貪殘
無耻所致蓋其初散鹽鐵失馬鞭即綁縛取牛
以激那燕之忿繼而趙坤文王細恩被殺又殺
票封倉以為償命之資致將土舍黎芳冕等殺
死因遂激變諸黎構黨驟成海濱大患知州葉
應時行事乖方撫夷失職釁端雖起於一旦弊
源實積於平時庶東都司海南衛崖州守禦千
戶所百戶王羽督備儋昌崖地方該衛指揮僉
事王維平居則狃於宴安共取饜於夷族有事
則交相退託遂釀禍於生靈俱應叅究既該御

史黃

具題前來俱應題

請合候

命下之日本部移咨提督兩廣都御史歐陽

會

同總兵官陳 查照御史黃

所奏事情協

謀計處審勢相機如果流毒鄉邑法不可原橫
行猖獗勢不容緩一面星馳具

奏一面從宜動調廣州肇慶等處達官達舍及附
近衛所官軍左右兩江土兵大約不過九千員
名分作三枝選委謀勇文武官員統領前去將
前項稔惡黎賊村崗查審明確分別畫圖相機

進剿諸不係爲惡村峒先期分委的當人員曉
諭安業勿使自相驚疑進兵之日仍戒勿得折
馘良善濫及無辜以希功賞違者聽巡按御史
指實叅劾其或首惡已就誅擒餘黨願從招撫
即行從宜處分或即要害處所團結軍兵置戍
或令村峒黎長歲時到官省諭不必興師動衆
以滋邊患可剿則剿可撫則撫務期蠻氛早蕩
邊域底寧以稱委任及照起釁判官黃本靜催
行按察司究問從重發落失事知州葉應時百
戶王羽指揮王維通屬有罪但念用人之際合

無俯從所請姑令截住俸糧戴罪殺賊仍移咨
都察院轉行彼處巡按御史隨軍紀驗并查都
指揮梁希孔先次領兵與黎賊對敵損傷的實
數目通候事寧之日將剿撫過及有功有罪失
事人員審擬參酌分別等第具

奏定奪等因覆題奉

聖旨是欽此欽遵備咨前來通行欽遵及差委神電
衛指揮范德榮管押軍門聽調順德縣打手梁
文會等并思恩田州報効日兵共七百一十五
名前去崖州協同見在官兵併力截捕并差官

分投督調廣西左右兩江土官目兵聽候分哨
進剿續又准兵部咨該臣等會題前事奉

聖旨兵部知道欽此欽遵本部看得題稱崖州地方
止強石訟等村賊首那燕等又復効尤倡亂傳
箭邀黨大肆流劫殺擄人畜焚毀室廬事雖發
於判官黃本靜一人縱下之所激而地方官平
素撫字之無方已經行委都指揮梁希孔統領
官軍前去撫捕內抱浩新村等村即已悔罪輸
誠聽撫惟止強石訟等村尚爾負固猖獗各一
節查與御史黃 所奏相同合咨前去煩照

本部先次咨文備奉

欽依內事理會同總兵官陳 一體查照施行備咨
准此又經通行遵照去後今據前因臣會同鎮
守兩廣地方總兵官征蠻將軍太保兼太子太
保平江伯陳 議照瓊州府屬崖州感恩昌化
等縣地方止強我淺巫我等村黎賊那燕等本
以漏殄遺孽因忿倡亂遂乃扇動徒黨傳箭効
尤臣等念其釁端起於有司倡首成於一人節
行該道守巡兵備等官引咎開誠多方撫戢及
行拏判官黃本靜正罪以伸其憤乃猶敢益肆

猖狂畧無省悟攻圍城廓剽掠鄉村擄財必繼
以蕩焚殺人動至於支解或愈撫而負固益堅
或暫從而尋復背叛或陽順而陰逆或沒東而
出西馳突克斥之勢益甚於往年狡猾變詐之
機莫測其常性今又敢僞擬總兵叅將指揮千
百戶等官名號坐轎乘馬張傘執旗三州縣之
地遭其破殘一海南之境被其搖動罪惡貫盈
神人共憤此

王法之所必誅而弗可赦者也既經該道守巡叅將
等官重復計議應剿村崗應分哨道畫圖貼說

前來又該三司各官覆行會議相同委應亟舉
除一面督行廣東布政司整辦軍需糧餉等件
一面差官齎執

令旗令牌分枝催督左右兩江土官目兵及起調
附近衛所漢達官軍民壯打手人等行委鎮守
廣西地方副總兵沈希儀原任分守雷廉高肇
地方左叅將今聽調武鸞廣東都司署都指揮
僉事梁希孔守備惠潮地方惠州衛支俸都指
揮僉事張宗等統領尅期抵巢按圖撲剿仍照
例約會巡按廣東監察御史同行糾察姦弊紀

驗功次及委布政司官一員總理軍前糧賞仍
候督催官兵齊日分定哨道尅定進剿日期另
行會本具

奏外緣係懇乞大兵剿除劇惡黎賊早救民命以
全地方事理爲此具本

嘉靖二十八年五月十五日

欽差提督兩廣軍務兼理巡撫兵部右侍郎兼都察

院右副都御史臣歐陽

爲預處兵後地方

以圖治安事據廣東布政司呈奉臣等案驗前
事該本司掌印左叅政沈應龍會同按察司掌

印帶管都司印事副使蔡克濂議照瓊州府屬
地方乃古珠崖儋耳之地孤懸海外民岐雜居
黎氓峒寇往往恃險負固肆行剽掠生民屢遭
荼毒之慘有司漫無撫禦之策嘉靖二十年內
賊首那紅等倡亂奉調官兵剿平添設叅將一
員在於崖州住劄地方賴以稍寧嘉靖二十六
年又以冗員議革迄今甫及二年而賊首那燕
等又復倡亂此其效驗足有明徵見奉軍門調
兵征剿計日蕩平復蒙留念預行議處添設官
員住劄撫綏鎮壓此誠瓊崖地方萬世之計海

外蒼生無窮之福也職等公同會議得該府地
方原該設有海南守巡官今查布政司止額有
左右叅政左右叅議共四員分守嶺南嶺西嶺
東海北四道事務其海南道事務常以海北事
簡行令無理是以官無專責又以渡海艱險少
有親臨其地者其分巡官無理兵備雖於該府
任劄又因地方廣遠經歷難周况崖萬二州相
去府城數百餘里一遇有警馳報經旬緩不濟
事茲欲圖爲久安之計除分巡官額於府城任
劄外必於崖萬二州再設專官任劄庶彼此相

依事克有賴合無乞為奏

請復設叅將官一員布政司添設分守右叅議一員加以撫黎職銜各請給

勅諭叅將官專住劄崖州分守官專住劄萬州與分巡兵備官更番巡視操練兵馬撫輯黎民防禦海寇釐革奸弊振揚威武遇有盜賊生發公同計議統督官兵相機剿捕各官若有遷轉須候新官交代不許輒便離任如有不能候代事情叅將查於都司僉書官守巡查於布按二司事務稍簡官員呈請暫代亦令前去各該地方任

劄行事等因到臣據此案查先該臣等議照瓊州府地方孤懸大海之外黎岐盤據其中所賴以鎮定而撫輯之者惟守巡官緣分守官因無專責多不親臨分巡兵備官雖例於該府住劄亦以事故不常權攝者多掛虛名不肯巡歷其地至嘉靖十九年內又因事添設叅將官於崖州住劄近於嘉靖二十六年內又以事寧冗員奏革以致大海之外三千餘里之間經歲無一上司官至其地州縣官吏因而敢於縱肆科索賸削漫無紀極民黎既迫於誅求亦復玩慢忿

矣無所顧憚此則今日崖感黎首那燕等激變
叛亂之所由起也已經奏奉

欽依見行調集兩廣漢達土官軍兵分定哨道行委
副叅三司等官監統進剿仰仗

天威滅亡可待但欲為地方久安之計要在兵後議
處得宜蓋大亂之後必有撫綏安定之方以調
攝其厄羸其責在守巡又必有鎮靜彈壓之術
以消彌其餘孽其責在叅將今十三州縣之間
地方綿邈除瓊州府已定有分巡官住劄外應
否於何州縣設一分守官何州縣設一叅將官

各住劄又作何處置使各官俱任有專責志有
定向遇有事故不致缺人如內地三司然各州
縣雖在海外之遠而法度昭明紀綱振肅官吏
有所畏而不敢肆奸宄有所憚而不敢蕝此亂
後急務之最重大而不可緩者查得往年征剿
各地方兵後事宜俱俟班師事寧方行議處今
該府相去京師萬里若候事寧始擬舉行則展
轉之間動是經年不無緩不及事除地方別項
一應區處事宜俱仍候事寧另議外所據前項
議處守巡叅將官事情干係重大急務應須奏

請已行廣東布政司轉行按都二司各掌印官會同從長查議除分巡官額於瓊州府任劄外其餘何州縣應設分守官何州縣應設叅將官分守官應否添撫黎職銜與叅將官一同請給

勅諭以便行事各官隔在海外遇有事故應否候代如有不能候代事情應否坐定何官暫代亦令住劄俱一一會議停當具由通詳去後又准兵部咨為剷除黎患以靖地方以圖經久事該吏科右給事中鄭廷鵠題前事本部看得本官題稱瓊州府屬崖州感恩昌化地方黎賊搆亂負

固不悛進兵之數止於九千不無尚寡當添調狼土官兵打手數萬期以不誤軍機聲勢大振所至披靡及稱成功在勇圖揆在謀克捷雖難經畧為上其所當圖揆并經畧者各三事乞要再加詳議施行一節為照本官前項疏陳大意以黎寇之猖獗異常兵必大集征必慎謀藉謀以揚威則巨患可息乘威而布法則善後可圖是其聞見真切計慮周詳相應議擬合候

命下本部移咨提督兩廣都御史歐陽 會行總兵官督同該地方官員計量賊勢如果重大即

便添調狼兵募集打手人等及時並進大加剿
除其始也據陵水以搗其穴而遏其趨安黎岐
以散其黨而孤其勢土舍藏姦多方防杜首功
多寡不必大拘如前所云當圖揆者其終也招
集新民定以約束多興學校禁挾弓矢復故地
設縣所授田廬鑿通衢防阻塞建參將於要地
使之畫便宜治城廓興水利徙反側如前所云
當經畧者若果有關於用兵及善後之道務要
一一舉行中間倘有未盡或難於執泥者亦聽
隨時斟酌期於計出萬全功收一舉以為瓊人

永利勿蹈往年故轍徂於近功因循苟簡塞責
了事其所稱建立參將久任責成一事尤係要
務查得嘉靖十九年瓊崖等處已經設有此官
後該彼處提督建言裁革不虞其有今日似失
之輕合無備行撫鎮衙門作速查議如果相應
復設即便相擇適中堪以任劄地方畫圖貼說
并查舉謀勇素著堪任參將官數員一併題
請定奪再照前項黎賊僭立名號攻逼所城流劫
鄉村殺害人民不計其數州縣地方五六百里
之間道路為之不通是其禍甚慘而勢甚危地

方兵備而下軍衛有司責俱難辭但時屬軍興
過亦可使合無仍行兩廣提督軍門徑自嚴督
各官戴罪幹理彼中兵糧等項待候事畢分別
功罪明白具

奏以憑議擬賞罰等因具題奉

聖旨這剿捕黎賊并處置地方事宜都依擬行兵備
等官姑着戴罪管事欽此欽遵備咨前來欽遵
通行外今據前因臣會同鎮守兩廣地方總兵
等官征蠻將軍太保兼太子太保平江伯陳
巡按廣東監察御史陳 議照瓊崖地方孤懸

大海之外自有天地以來即為黎岐巢穴盤據
五指諸山蔓延十三州縣其附近者為孰黎固
已入版籍任稅役為編民遠者為生黎力食自
營無預於州縣孰黎惟為編民故土舍里長得
以凌轢而剝削之州縣官得以刑罰而誅求之
故每每激之而至於生變生黎惟無預於州縣
故無土舍里長之擾而州縣官亦無因而誅求
之故未見其為患縱有之亦不過為孰黎所誘
脅耳是瓊黎之變非為無州縣以統治之實起
於官州縣者之非其人州縣官之貪肆亦非為

無法制以禁治之實起於典法制者之無其官
查得瓊州一府十縣三州之地止一分巡副使
其分守官原缺設以分巡兼管其初授而來也
每畏怯而甚遲及遇有事故而去也多愒幸而
甚速其在任則又公出住府之時多而巡歷考
覈之日少各州縣每數年不一見上司入其境
聞其俗察其政而黎民亦懵懵然無所控訴聽
有司之爲至其弗堪則惟有反而已矣至嘉靖
十九年大征之後始添設一叅將後以叅將官
不得其人專務威福士民不樂遂議罷夫既有

不才有司官以激之而又無一將領官以鎮壓
之此崖黎之變所以一動而弗可輯者也茲者
官軍大集進剿有期仰仗

天威滅亡可待顧惟地方久遠之計不在於多殺戮
以爲功惟在於飭法制以善後譬之身焉彼旣
爲編民猶之手足肌膚也惟風寒暑濕之失其
養而後震掉躑躅痿痺之患所由生治之者惟
去其疾之甚調攝其元氣以漸復其初而反其
爲吾用則已矣若盡弃之則何以爲身也所據
三司等官議呈要添設分守官與叅將以爲善

後之圖委應依擬但地方當大變之後添設各官要在得人若尋常照資推用則或不能當其才又或以別省官推陞則亦無以濟目前之急臣等查得見任巡視海道廣東按察司副使黃光昇明達足以照奸而事機善應縝密足以立政而計慮克周見任分守海北兼管海南道廣東布政司右參議方民悅深沉不露而事出有條從容不迫而慮動有濟此二臣者均堪備分守官之任者也見任添註廣東都指揮使司署都指揮僉事俞大猷以忠義立心每奉公而忘已以意氣從事恒虛已以下人隨所至而士民咸歸隨所委而事功克就胸中兵甲自負不群目前將帥鮮有其儷原任分守雷廉高肇地方今聽調左參將武鸞老成不肆謀勇有爲夙理新興之寇雖嘗多事而寡功近守感恩之城克屢出師而有獲此二臣者均堪備參將之任者也如蒙乞

勅下該部再加查議倘以臣言爲不謬乞將黃光昇方民悅二臣內推用一員量陞參政職銜令其分守海南地方兼管撫黎於儋州駐劄俞大猷

武鸞二臣內推用一員充海南叅將官暫於崖州駐劄各授以

勅書令其欽遵行事凡地方善後事宜聽會同該道分巡官相機協謀開誠布公審向背以定其約束之規察好惡以經其賦役之制興禮義以革其邪心厲武威以銷其異志明賞罰以一其趨肅官箴以重其體俟威德昭布黎民信服之日如其機有可乘勢堪改拓何處可添設州縣何處可改建叅將府何處道路可通何處屯田可設亦聽其明白開呈畫圖貼說以憑酌量奏

請施行以後各官并海南分巡官遇有陞遷事故等項須候交代方許離任着為定規再照崖州去瓊更僻且遠崖州既設叅將應再設一守備官於感恩往劄以為聲援就以見用新陞總督廣東備倭以都指揮體統行事指揮黑孟陽政任原缺另行推補候地方事寧之日應否存革另議奏

請定奪緣係預處兵後地方以圖治安事理未敢擅便為此具本請

旨

嘉靖二十八年十一月二十三日

欽差提督兩廣軍務兼理巡撫兵部右侍郎兼都察

院右副都御史臣歐陽

為懇乞大兵剿除

劇惡黎賊早救民命以全地方事案查先准兵

部咨為緊急重大黎情早乞添兵應援事該巡

按廣東監察御史黃

題前事內稱崖州地

方止強石訟黎賊那燕等搆結各村黎黨四千

餘徒流劫鄉村殺擄男婦燒毀房屋敵殺官兵

東奔西出勢甚猖獗兇焰蔓延迫近城廓伏乞

勅下兵部嚴行撫鎮諸臣撫剿等因該本部查議合

